



做生理

論真，生理人若干焦對頂手盤便品轉來，照本疊寡，就隨賣出去，這內底的所費總拚拚咧，揣有一割的利純通袋入來褲橐仔燒燒，就真正土地公有保底，規暝暢甲目屎膏強欲津(tin)落來。

抑若當銷、時行的大色貨，價數攏嘛削甲貼底貼底，削甲流血流滴才有生理通做；有時陣閣著兼開發票予人客報銷就慘矣，趁有空五(khòng-ngóo)的利頭，就會覷佇壁角偷笑；毋過，若共稅金、配達的運費扣掉，窮有空一就算袂稔矣，正經是欲哭無目屎，講都無人欲信；總是，末趁的貨仔，若齊用現金咧買賣，猶有足濟人搶欲做，反顛倒若無趁甲半仙，食飽換枵的生理，無人肯做。

加工過，才閣賣予下手的貨仔，決定愛掠較好趁，料錢、人工、稅金、運費扣掉莫算，若趁無加二、三來食燒、食冷，實在袂和盤；加工的頭尾愈長、愈濟改，就愈好趁，小可換樣、改裝，外形變較嬌款，親像查某人穿衫、妝姪(tsng-thānn)按呢，顛倒會當共人客騙(pián)較濟錢轉來。

貨仔若賣予彼款較大間，有倩(tshiànn)會計、出納的工廠、公司，交關攏用賒的，月底共欠數攏倚來，做一改清算，過月開出來的是一張三個月後兌現(tuī-hiān)的期票，頭尾總扯，四月日才看著銀票仔，命若較短的，凡勢領無、食無，才是冤枉！

啊若衰到地矣，種匏仔生菜瓜予伊倒去，四月日的貨款即時變有數，錢額若細，是猶無 tsùn-būn 著，碰(pōng)著大注的，這聲，店若無倒，才是奇！

作者：藍春瑞

☆詞彙學習☆

- | | |
|------------------------|---------------------------------|
| 【一割】tsit-kuah：一成、百分之十 | 【騙】pián：掠奪；詐騙 |
| 【空五】khòng-ngóo：百分之五 | 【有數】phànn-siàu：呆帳 |
| 【末趁】buàt-thàn：微利、利潤低 | 【無 tsùn-būn】：無動於衷、無關痛癢。或可寫為「顛悶」 |
| 【袂和盤】bē-hô-puānn：買賣不划算 | 【大注】tuā-tù：大筆金錢出入 |
| 【妝姪】tsng-thānn：打扮、化妝 | |

☆文法學習☆

【.....到地】：「形容詞+到地」是「某種情緒到了極點」，本文「衰到地矣」是「倒楣到了極點的時候」之意，強調一個「衰」字而已；唸法為 sue--kàu-tè--ah，亦即「衰」字唸本調，其餘「到地矣」這三字均唸輕聲，例如「氣到地矣」、「愛到地矣」都是這種用法。